

四庫全書

集部

欽定四庫全書

五百家播芳大全文粹卷四十七

宋 魏齊賢

葉 蔡同輯

上啓

贅見

贅見教授啟

唐清臣

威鳳景星已快爭先之覩泰山北斗幸酬仰止之心久

欽附驥之誠茲遂攀龍之願輒修尺牘聊叙寸悰竊以
傳道授業惟其師化民成俗由于學陶鈍為利而質無
留礪揉曲為直而才必中繩自非學者之宗曷畀師儒
之選招諸生而立其下皆賴漸摩取一人而拔其尤悉
歸教育恭惟某官游夏淵源之學孟荀羽翼之師川媚
山輝夙蘊珠璣之美日光月潔更多締繪之文發藻賢
闕青錢累中揆章宸陞丹桂高攀暫掩黌舍之談經會
進玉堂之視草光騰分野應千里之文星霧蓄襟懷布

一城之教雨竹見綸言之迅召未容鄉校之久留某豈
意微蹤獲瞻至矩負畫虎類狗之態無毀瓦畫墁之謀
鉛刀尚冀于陶鎔駑駕猶資于鞭策與其進也庶銷學
圃之心從而師之願預摳衣之列

贄見縣宰啓

崔魯卿

百里孚民久服神明之化一廛受地未修桑梓之恭茲
執贄以踵門敢因文而見意恭惟知縣學士先生用儒
飾吏以道覺民蘊藉乎前輩忠厚之風騰踏乎中原太

欽定四庫全書

五百家讀芳大全史料
卷四十七

二

平之日冲襟雅量眇萬物而隘九州筆陣詞章掃千軍
而流三峽才無施而不可治所至而有聲金馬玉堂蓋
升華近銅章黑綬暫屈承宣惟桐鄉凋瘵之餘賴單父
循良之治公私兼富何必去珠而復還刑罰不施自可
鳴琴而坐治四民咸樂于善政一同如在于春臺聞武
城之絃歌已凝嘉績作商巖之霖雨行攀祖風某鉛槧
小儒簪裳墜緒幸不習農商工賈之業粗知求仁義禮
樂之原覽患子之五車推鋒彌若破少陵之萬卷下筆

愈難未能自致身于青雲何以慰倚門之白髮人方共
棄志乃益堅故欲見天下之英豪庶可卜終身之窮達
幸託部封之內獲依師帥之賢念勢隔于雲泥終未瞻
于山斗茲者不知其貧賤率然進拜于光儀李元禮之
龍門獨高容接許子將之月旦更在品題情悰欲言楮
毫莫既

贄見縣丞啟

黃子才

一塵同井每懷葵藿之心九里潤河密託枌榆之廕論

交夙佩于傾蓋向風竊慕于執鞭幸許登龍敢希附驥
恭惟某官山亭流派魏國傳芳藉七葉貂蟬之貴而自
視猷然摘百篇錦繡之文而咸推作者藍田松竹嘗助
吟哦畿邑江山悉歸詞藻德高里閭所居盡仰其仁人
治表搢紳有識舉揚其善教四海鴈列萬里鵬搏州縣
之職豈久徒勞公侯之後必復其始牙籤萬軸家傳豈
在于滿籛蘭玉一枝門大當容于駟馬並新閥閱煥寵
鄉邦某遇合歷年服膺有日自惟旅進旅退屢勤公子

展履之迎仰期三沐三薰當効門人摠衣之請輒修尺
牘聊表寸誠伏望宏量矜愚深情悼屈未酬宿券敢伸
九鑠之投猶冀餘波俾脫沙泥之死為幸多矣何日忘
之

起居

起居秦丞相啓

劉韶美

孤城遐守越在天涯潭府具瞻邈然雲表視仙凡而有
間間茵鼎以無從天地之正氣在人自有開闢陰陽之

妙君臣之嘉會以德固宜感格神明之休而况忠信城
池外閑宗社仁義膏澤兼濟華夷以茲超軼之勲宜獲
盛多之福恭惟某官誠參覆載謀合聖神行孔孟之微
言立伊周之難事當機會未分于禍福以身任之自我
衣馴致于和平其心勞矣緒餘及物炳煥如春未聞草
芥之微不在陶鈞之數某天資庸陋門緒凋零蟬脫塵
沙之區蚊負丘山之惠尚嘆九霄之迴絕恨無兩翼之
高騫當春令之融怡阻台躔之問訊治心養性故知出

造化之深機為國與民豈敢廢興歌之善頌

起居秦丞相啟

鄭敦夫

百官斂板曾陪東閣之後塵上相提衡偶忝南州之半
刺得非所望喜不自勝辭履舄之未幾戀門牆而彌切
恭惟某官孤忠許國一柱擎天尼父自生民而來阿衡
任天下之重節義出處神明扶持兼全夷夏之生靈坐
致基圖之晏粲觀風雲之際會度越古今盡日月之照
臨咸歸陶鑄某自憐鯢士素賴洪鈞惟先人曾蒙垓北

之私故賤子得與提攜之末幾三山之節鉞可謂顯榮
餘百指之妻孥皆合飽煖丘山之賜骨肉以銘眷惟商
律之正行緬想化機之多暇兩儀並贊百願咸宜善頌
惟深陳言不既

起居丞相啟

周茂真

竊叨大造獲佐郡條仰戴深仁猥霑祿食念居官之既
久蓋揣己以誠慙幸與斯民各得其職咸識昇平之樂
一無患苦之虞凡此所蒙未知為報徒勤夙夕以赴事

功曷有須臾可忘恩紀頗惟無狀實深此心瞻仰父師
夢寐牆屏獨于上下之分在所當嚴故惟咫尺之書不
敢時進恭惟尊居廊廟誠格穹祇陰相其身厚介之福
某官學優孔孟道邁伊周得千載之時而志已畢行有
萬世之功而古所未見而乃益為恭儉不自滿盈盛德
有容小心事上輔皇圖于既固扶帝室以彌尊益致無
彊之休永隆可大之業勲德若爾壽嘏稱茲某趨拜未
期傾依尤切冀為廟社增輔寢饗上副九重之心下答

輿人之意

起居昭文相公啟

宋子京

伏以函宇乂安協氣翔舞四鄙弗聳九扈告成仰至治
之日躋惟宗工之時乂某官茂總民極翊宣帝華奮之
為昌言大猷歌之為六府三事是以方國騰頌神明効
祥截然棟隆屹若山立格高穹而底績暢熙載以無疆
某遠播州條夙承公蔭身限江漢心馳門闌通謁未展
禱懇茲極

起居沈侍郎啓

任子淵

飄零湖海嘗瞻英偉之風自致雲霄倏異等差之分悵
萬里音塵之隔勞八年寤寐之思寂無書郵仰肅記室
顧難冒于法義非自疎於仁賢今茲守邦乃幸接壤承
流宣化古循吏之可師卹難分災大諸侯之足倚敢憑
竿牘少薦悃悃恭惟某官器宇沈涵襟靈韶潤三科論
事家傳既濟之風八詠裁詩世擅休文之義出偶亨嘉
之運超登華要之途忠言嘉謀日聞于內朝清德雅望

風動于多士寵參大計茂著能聲累腐錢流國有累年
之蓄衣餘食足民無加賦之憂輟自九重屬當一面用
慰具瞻之望即為登進之階將使海內被其埏鎔豈但
蜀人歌于襦袴某受知有素懷祿忘歸晚晚年華迫西
山之短景迂疎政術借東璧之餘光

起居葉侍郎啟

趙承之

驟違恩館遽易歲華川陸阻修既無緣仰瞻履舄置郵
疎濶又不獲時候起居心搖如旌汗浹于背惟春之仲

在陽乃舒欽惟里第燕安琳宮休暇神明相佑戢穀繁
多恭以某官迪德高明養氣閔大卓爾見乎事業沛然
溢于文辭不肯吐剛而茹柔舉之者山甫未嘗喜仕而
愠已忠矣乎子文雍容大江之濱追逐故鄉之樂父老
迎拜正誇萊子之綵衣吏民聳觀曾侍玉皇之香案竚
奉賜環之召遂膺補袞之求某嗟喑腐儒侵尋老境顧
奉事以良晚荷察知之獨深驥蔑片言了無僥倖山公
密啟驟賜品題方深祭竈之榮遽起戀軒之嘆報將軍

以國士敢自比于昔賢歸主人之舊巢冀不慙于他日
方畏簡書之守未遑門館之趨願調護于寢餐益綏將
于履福載惟約結靡所究陳

起居入國郭龍圖啟

葉少蘊

伏承親奉朝言謁趨遠帳達漆墀之鷺序度朔漠之龍
沙方履道途諒疲筆轡忠藎固膺于神祐興居倍協于
天和伏以某官儒術宗工士林夙望行誼聞于天下智
畧奏于上前慮切事幾議通國體况寵臨之在邇屬行

李之方勤適在燁炎冀加頤愛

起居兩府啓

李成季

仰泰階之焜耀目遠鈞庭奉使節以周旋身勞塵鞅稍
易寒溫之序未修咫尺之書每思犯分以陳情反畏瀆
尊而取戾雖江湖之量無待細流之歸而燕雀之軀寧
忘大廈之託徬徨茲久畏惕益深與其自息而不言未
若以誠而歸罪恭惟某官著龜舊德柱石元勲奮千載
以有為躋四方以無競君子在位士皆樂用其才百姓

既安民罔不同于善道行而政肅法具而官修百穀順
成四夷內附在蕭曹近用不過鎮以無為如房杜淺能
何所施其素業粵惟盛際允屬元臣三代可追不獨稱
于兩漢大章繼作方有賴于一夔某樗櫟散材墳壚惡
埴猥叨匠斲竊累陶埴擔彈夙夜之勤不忘頂踵之報
高秋在序福履是宜尚期寢餼之以時俯慰士民之所
望

起居祕監啟

賀允中

藏室蓬萊唐館峻清華之望泰山北斗韓門極瞻仰之心倘慕義于一朝愈聞風于百世敢修竿牘少薦精誠竊以北辰樞極之庭東壁圖書之府天垂象以經緯聖作括以鋪張採掇無遺搜羅殆盡盛蘭臺之萃聚重芸閣之討論自三墳五典皆得其傳至諸子百家時合有用金匱石室之藏甚秘漆書竹簡之跡猶存洋洋然儒藝之淵源蕩蕩乎聖賢之閭域幸斯文之未喪屬吾道之將興必得真賢以贊盛事恭惟祕監先生受天間

氣為世聞人學通今古而大醇識造精微而自得一門
鍾秀得非清白子孫二陸馳聲端是文章兄弟自古得
稱望族殆今最號名家負醇儒姿已襲芳于詞伯真大
手筆更增美于許公簡在淵衷擢膺臚仕敷教法于江
浙貳學政以成均大有過人出其類則拔其萃故無棄
物虛而往者實而歸凡與門牆悉歸模範既聯華于冊
府尤藹譽于搢紳共欽元禮之聲名想見紫芝之眉宇
不遂解顏之一笑但知引吭以長鳴某蓬葦鮪生岷峨

冷族為貧干祿既壯登科緣冒選于賢闕亦抗顏于泮
水潛心自苦希董子之下帷用力徒勞類宋人之刻楮
比捧二天之公檄俾搜四庫之遺編誓殫聞見之私蔑
有涓埃之補望洋而嘆撫己自驚顧惟朽枿之資遠託
慶雲之廕刻心竦慕翹首仰瞻擁篲埽門未快登龍之
望因風奏記敢希附驥之榮

起居李帥啟

李成季

一違鈞坐再閱歲華久撓俗吏之簿書幾塵小夫之竿

牘盈尺之紙安能自寫其肺腸萬頃之波固亦不遺于
汙潦憂皇所載展轉益危與其自棄而不言孰若以誠
而歸罪恭惟某官生民先覺盛世元臣吐詞為經鄙荀
揚之未粹以道致主非堯舜而不臣經綸以四海為心
進退有古人之節前功未就毅然待旦而行庶政已成
率爾乞身而去暫資舊德作鎮別都時驅大府之旌牙
坐嘯昔游之泉石腹心之託曾未間于須臾天日之光
常不違于咫尺精神相感寤寐不忘宜一德之有永乘

三陽之並進為天下計必資良弼之才以我公歸永作
生民之福某素慙斐陋曲被陶成每殫十駕之勤愧乏
一毫之補輟鮒得水雖切幸于餘波胡馬嘶風終不忘
于故國限拘官守阻造賓庭

起居帥座啟

楊廷秀

望三光五岳之氣無日不仰于緒風隔千岩萬壑之雲
此意獨馳于清夢亦知寓書莫如于覲面然非修詞何
足以寫心未審中台之餘輝能照徼尚之域否恭惟某

官孤忠貫乎霜日百蠻震乎威名當其立朝社稷豈徒
于九鼎及其乘塞金湯不在于長城項登樞庭頓起國
勢使朝夕謀謨于廊廟則笑談整頓乎乾坤惟其持方
而入圓是以易間而難合初來洪府覺西山爽氣之愈
清旋鎮荆江喜赤壁風流之未遠將克復神州之是恃
何卧護北門之足云登庸之期跬步可冀某迂無所用
老復奚為題慈恩之名要自是門生一人之數受新吳
之邑獨後于屬吏半年之間尚憶拜公于道林嶽麓之

時頗辱借譽其波濤雲霧之句雖前古所謂之知己未必有之故半生不幸于無遭得此足矣向者居中而未嘗密今茲在外而不敢踈此豈緣勢利而相求庶幾蒙肝膽之洞照其為歸荷罔既敷宣

起居李宣諭察院啟

高子美

天下澄清攬轡爭傳于孟博海濱竊伏我冠輒効于不疑大勞交口之先容偶善一言而執手荷知云至俯己奚堪念違去于星躔俄薦更于月律敢僭置函之禮少

伸賀厦之私恭惟某官直幹剛方冲襟凝遠蜚英聲于
早歲躡清選于明時坐鎮柏臺森若在山之藜藿遠辭
蕭斧悚然當路之豺狼恩言共僖于來宣本業皆期于
自反律貪薄而歸忠厚變愁嘆而為謳吟皇皇者華風
望已光于原隰肅肅其羽飛鳴行傳于雲天某蓬蓽寒
生箕裘末學姓名誤塵于仕版功業難遂于亨途調職
漢池悵舊都之悠邈擬司衡岳驚新職之變更將易地
以求安賴依仁而克濟自初攝局不靳提衡寬其逆旅

之懷示以試人之漸然曾參之孝義不忍于離親而毛
義所榮心常急于捧檄未容繼請何幸得圖不令單騎
之冷官每看雲起與洒一封之和氣又逐春來眷茲終
始之恩永有依歸之地青陽在序淑令已行宜倍保于
粹明式茂綏于福履願言之極敷述奚殫

起居憲使啓

李成季

講聞高譽雖懷仰德之勤奔走宦游未獲依風之便比
叨屬部猥託臣庥將觀使節之華遂如昔日之願恭惟

某官器周物表識洞幾先早膺中宸之眷求特委東州之廉按奉行邦憲方曲盡于下情進對楓庭將入參于近輔卽期迎拜倍切歡愉

起居呂漕啟

張芸叟

早游西學曾奉先塵顧書謁之闕然獨瞻依之勤止物華向晚歲序將更諒惟啟處之和允有神明之相伏惟某官學窺聖閨心潛道樞傳孔孟之精微陋荀韓之出入經帷策府先諸彥以登瀛使節皇華總連城之攬轡

矧茲汾晉介彼羌戎方聖主之憂邊簡名臣而出使少
假阜通之績遂居獻納之榮并部正寒邊勞方劇尚加
調于吉履以前御于泰亨向德何窮據懷莫既

起居提舉啟

張芸叟

向風之久為日已深去國飄然願莫伸于披覲登朝藉
甚聲已播于流聞未諧牋記之修難盡傾馳之素伏惟
某官材優國器道炳儒珍博通今古之宜兼備員方之
用上心乃眷早膺密勿之求民政是先出奉澄清之使

少需報政方佇疇庸將式賦于僉俞遂允升于華胄時
寒在序歲晏將更諒視履以均和有神釐而顯相冀尊
頤養前御泰亨善頌之誠文言莫究

起居鹽使啓

趙德莊

繡衣直指有嚴攬轡之行弩矢前驅獨後望塵之謁占
皇華之下燭偃風化以增勤恭惟某官天爵崇高卿才
偉秀據經論事蓋七相五公之傳貫道立言皆三代兩
漢之作自拔茅而連茹爰盛飾以入朝直弦恥比于曲

鈞方枘果乖于員鑿三仕三已非吾黨之戚欣一死一生與善人而進退逮羣陰之殄弭偕衆正以來歸歲寒灼見于後凋盡日對揚于三接方欣賈誼道宣室之鬼神豈意宗元違尚書之牋奏嘆虎豹憎人之遽偉風雷孚號之新任山甫以將明初未嫌于內外議李愬之彊富實有繫于本根少慰江湖之心遙膺廊廟之拜某陸沉末路山仰大名早愧巫醫未達師傳之願晚從章服徒興俗狀之嗟維昔先君獲承汎愛撫歲年其既遠悵

門戶之寢衰東里方孤正賴威嚴之霽山公猶在不知
意氣之頻首夏恢台雄臺清簡願後將于德履用俯答
于輿情

起居提刑啓

朱子發

備邊下塞常瞻燕几之遙託問遠郵阻贄使臺之邃方
秋斂物緬惟寢餽之和以德召祥當有神明之相恭惟
某官器識博重風稜整嚴以德望自高以忠義自處重
恤威獄邇宣惠和民忘濫寃上所眷倚行趨密勿之地

大展澄清之才某託託最深瞻風正邈祈精夙夜之眷
仰對邦家之光

起居監司啟

崔德符

近馳單介輒貢柔緘屬大旆之載馳跂行臺而莫及第
憑疾置冀躡清塵諒乘隱几之間獲布戀軒之懇即日
伏惟某官肅臨使部甫憩輶車履華月之載陽順生辰
而協吉竊以荆楚悉多于秀士屈宋代有其遺風緬惟
攬轡之餘不乏濡翰之詠高情寓物吟成春草之篇妙

思有神賦得青峰之句伊江山之有助宜咳唾以增妍
更期藹政最以上聞促鋒車而入覲獻納雲臺之表翔
趨紫殿之班英譽聳乎朝端正論聞于天下然後寵協
夢卜峻秉鈞衡某猥以朽疎辱紆盼睠絲緝縷僅成
骯髒之文舉秀韜瑕曲玷獎題之目銜恩有素結戀無
涯禱頌之情倍百倫等

起居運判啟

陳師禹

披風在昔尚附英游嚮德于今莫追雅素徒有傾馳之

切均乎鑒寐之勤歲事將更寒威正苦諒惟福履保有
天和伏惟某官道直而方德恂以果器備經權之用學
兼今古之長物議所歸眷宸心而久簡邊儲方急持漕
節以來臨雖出使一方未伸志略而歸朝三接可佇搏
飛尚惟啟處之安加頤節宣之養亟登要路少副瞻言

起居吉守啓

鄭敦夫

頃承畿邑託庇雲陰今倅鄰邦密資河潤蹤跡雖云幸
會周旋蓋有夤緣恭惟某官學有家風才惟國器飾吏

治以經術結主知以猷為領袖百僚藹著端方于棘位
袴襦千里稔聞豈弟于棠郊行奉芝角入陪荷橐某顧
惟絲菲曾賴帡幪縻繫塵蹤冠屨阻隨于後乘跂瞻德
宇襟懷順沂于長江朱夏正隆黃堂多暇惟敷施于陰
德諒翕受于繁禧

起居太守啟

崔德符

鄙朴無華罷軟不振日積簡書之畏居多簿領之憂闕
布私誠冒塵燕几伏惟即日涉茲秋杪益練天和坐嘯

優游視履祜福恭以某官疏通成務豈弟宜民閱義禮
以為多藹聲名之藉甚承流宣化日底于成功增秩賜
金行膺于寵數某猥牽微祿辱在下陳實賴廕休庶安
迂拙

起居蘇守啟

王德立

夙擁旌麾最已騰于蜀右載膺綸綍餘波將注于湖
西凡屬庇庥舉增歡抃恭惟某官凝姿開爽種學淵深
文章克家挺挺有祖風烈行義厚俗顯顯為世聞人妙

簡宸衷亟躋禁從翱翔瑣闥居多獻替之謀出納文昌
薦被直清之命未調鼎鼐聊寄藩垣宣化承流諒益寬
于幽滯處中當軸行即聽于登庸某切伏聲猷喜親教
約尚遙趨謁欲進拜而未前景仰光塵顧飛緘之敢後

起居蔣守啟

李成季

少學屬文嘗起執鞭之慕晚從試吏濫陪入幕之游稍
親間燕之談良苦喧囂之後遽緣補外遂失依仁鷦鷯
一枝暫託蹤于美蔭鴻鵠千里徒絕睇于青雲仰惟剗

決之餘依有吉祥之助恭以某官識周萬理學造大原
以王佐而自期非聖言而不道躡賢科而特起軼俊躡
以先馳彈擊百僚卓鵬橫漢澄清屬部皎鏡懸秋優服
使華增嚴帥領泉流六路半居天下之利源膽落諸羌
獨出幄中之勝筭重以儒林舊德延閣清班未親日月
之光屢徙軍旅之政暫綴藩方之節制用釐天府之浩
穰初落筆以無畱不閱旬而稱治大豪結舌情窮片言
羣偷屏心首戴一尹方久虛于近弼已密簡于上知意

在本朝顧未伸其素業天將大任宜永庇于斯民某竦服誨言悵拘官守地遙望履心劇戀軒浩蕩江湖何待飛鳧之集低徊燕雀終懷賀厦之歸敢乞勉為邦家精調寢餼

起居鄰守啓

李成季

行郵濶畧曠馳款起之音大府重深徒仰俊明之德茂惟鎮俗之暇克擁自天之休恭惟某官學際聖真才高名世良二千石果膺治主之求課第一人行見褒書之

下某濫叨貳政獲芘鄰封顧韉鎖之坐拘莫親高範雖
馬牛之不及尚借餘光參對未緣傾依至切願保寢興
之美並介福綏之休

起居鄰倅啟

郭中行

督府闕決愧非半刺之良擊析相聞殊慶比賢之吉徒
有德公之辱尚疎奏記之勤逖惟燕閒休有協相恭以
某官器能通博風度醇深薦更寄委之煩夙振清修之
美豈茲別乘可屈遠圖佇顯效之寢彰副公朝之明陟

計光御政和叔司方伏覲上為邦家精調寢餽

起居鄰倅啟

李子思

結好鄰邦幸及餘波之潤被官半刺阻陪揮麈之談月
吉薦更郵音稍闕逖惟副貳之暇動協神明之休恭惟
某官德宇澄深聲猷聳邁游刃久當于煩劇宅心自處
于高明某濫以散才謬當別乘鄉閭已熟于風化治境
又託于芘庥仰德實勞馳心孔疚方應鍾之在候宜吉
履之順時伏願上為廟朝精調寢餽

陳情

上師相陳情啟

大鈞獨幹諒無間于涓塵小己自私冀偏承于雨露蓋
有意于保全者物類之妄意而無心于與決者造化之
本心既將投絕壑與深崖安得不跼天而躅地竊念某
讀書無用仕宦不諧偶緣管蒞之求誤廁搢紳之列炭
冰寡合獨僻見而守株燕楚背馳遂直行而觸網時逢
明盛身免誅夷聊從寬典以示恩姑屏遠方而不齒日

月歲時之易邁艱難險阻之備嘗六年之瘡痍交攻命
存如綫百指之飢寒未免地置無錐何期蟣蝨之軀幾
陷虎狼之口浮家泛宅萬死一生眼看荒壘之荆榛寸
心欲折夢繞故園之松菊何日歸期清時難遇而直道難行
化力易為而窮途易德此時遭際端望明公恭惟某官一代
宗工本朝元老以孔孟明道之學為學以伊周濟世之
心為心傳詩書禮樂易春秋之所不傳見唐虞夏商周
漢晉之所不見博覽古今于典籍未嘗一物之不知兼

存夷夏于生靈寧忍一夫之失所豈令寒賤獨漏甄陶
已甘絕意于簪纓姑欲託身于羈絆一丘一壑若猶自
遂于簞瓢寸髮寸膚皆是更生之骨肉情悰所迫戰汗
奚勝

上湯相陳情啟

薛元鼎

士為知己者用大賢何所不容物不得平則鳴唯善能
舉其類伏念某頃在丙辰之歲仰當太上之朝金人再
進于淮南鐵馬大陳于江上值南渡奔波之後屬東還

蹈海之餘侍衛單寒而無君子之軍轉餉空虛而乏小人之食乘輿既駕會宣王政事之甫修干戚攸陳過漢官威儀之未復百揆急從于舜狩六蜚暫駐于吳門民情已危國是未定或贊親征之役遂云罔有敵于我師爭陳善勝之機自謂不以患遺君父惟時上宰專彼長謀既召公不悅于周公豈晁氏獨安于劉氏効猷畝愛君之意奮草茅言事之忠顧易組代庖惟一相自喻然跳丸解難欲二人同心海宇安靖如平勃之交謹邊塵

不驚緩文武之一怒留陽城而伏闕泣賈誼以上書事
不果回身其能免衣冠有此第喜憂國之蕭公鼎鏤在
前豈忍愛身于臨賀命輕一葉恩重萬鈞止從會稽聽
讀之行旋被長安釋歸之命采堅素志未報明時逮後
來當路之臣惡昔在登門之黨投蛾火內匪自揆量見
蟹水中其如惴恐偶預省闈之羣試中遭鄉里之一夫
謂易名猶慕于相如宜伏罪坐連于賤子狀乃事于都省
指網疎投北之人下其文于曲臺使路絕圖南之便野

芹雖美誰將獻御以成癡仙鼠弗虛自擬升天而復墜
已侵尋于白髮久流落于滄洲所以為貧未能免俗看
人一第了無拾芥之勞閱歲三星反作覆焦之夢所幸
泥塗之辱未衰湖海之豪好在目光猶可射牛背之上
依然髀肉非無事馬蹄之間一座盡傾何言小異十手
所指敢愧前修是用布其腹心亦云適此機會藏器已
久恐有力者負之按劍弗疑非無因而前也恭惟某官
才高三傑道合四聰擅燕公之大筆而定社稷有功躬

博陸之小心而酌古今能斷兩朝注意迭居二相之尊
萬里折衝盡護諸軍之衆入齊魯侯之壽母出稱漢代之
忠臣共慶明良之逢大膺重叠之賞福不虛應澤當遠
施有一言可以興邦其上策莫如自治今日之事幸而
集諒無忘善後之圖中興之業誠惟艱願永懋自先之
贊有如愚陋何恥貧賤必諸大夫皆曰賢然後用之終
不起倖門之望雖明天子在上可出仕矣亦少示翰場
之興以素荷夫慈憐姑少陳于困躋清霜在候愛日回

春倍蘄茵鼎之調悉慰神綏之祝過此以往未知所裁

納拜

上憲使納拜啟

王以寧

千佛名中夙仰塗金之姓氏五經閣下曾為問字之生
徒有一子茲且當修好負二宜拜安得忘言恭惟某官
名世真儒褰帷俊使卓然君子之操綽有古人之風昔
我先人登科卒未題名未泯小錄猶存肆及孤生執經
鄉校濫執老聃之役剽聞夫子之言自別師門薦更歲

律邇黃緣于吏役獲趨造于賓筵我有二天已獲披雲
之願拜下兩手敢忘屈膝之勞諒黃壤同年之心無青
雲異日之誚敢期端授母事謙虛某謹當尊所聞而行
所知或有為于斯世進以禮而退以義庶不辱于通家

上太守納拜啟

張芸叟

書不盡其言禮止飾其貌先王為之度數君子尚乎中
庸行作而改易其顏色則謂之恭俛下而屈折其體支
則名曰拜用是所以事長不然何由貴賢苟非達尊之

脩三安得太祝之辨九恭惟臬官著龜王道衡鑑士林
言為典刑行建規表當總角之歲固已想聞其風茲莅
政之來幸得親炙其義每因公而造請必亢禮以周旋
處不遑寧退而內訟子夏之門人區別庸有後先次公
之曠吏未除猶能拜起然事契不淺無言則已踈勞謙
雖光過行則近逼在累朝之典故亦云隔品而致恭稽
唐室之上風獨有年家之叙拜幸免再三之避庶申悃
悃之情

起復

上宰相啟

孫仲並

惟悴行吟未脫江魚之葬慟哭流涕遽興風木之悲鑽
燧火以求新御祥琴而永嘆収召魂魄僅存偷生久矣
逃空恍如昨夢偶未填于溝壑尚有冀于桑榆苗槁欲
興大鬱雲霓之望鷄鳴不改詎乖風雨之期恭惟某官
巨力回天彌文作古任重道遠可謂大臣言聽計從簡
在上帝輔成致治保邦之業並彰繼志述事之光屬怨

敵之紛更復朋邪之彙進誦詩發冢藉交執仇含珠何
為方聽大小儒之議佩劍相笑遂成南北部之謠戰蠻
觸于兩角而交兵鑿混沌之七竅而報德不虞忌器幾
至焚廬式開賚弼之祥光補廣文之教譽阿毀即必也
正名助墨逃楊不為已甚一變旁僻曲私之俗遂即上
下交泰之期所謂衆賢咸和于朝豈有一夫不被其澤
伏念某寡徒少與多病早衰始畏途而問津遂營巢而
擇木比大鋤于非種固難追于深文衆怒所遷幾類水

中之蟹一揮而去又同瓜上之蠅方嘗膽于訟愆俄茹
荼而遭閔永惟事親飲養之志弗洎于千鍾獨有懷恩
未報之身所欠者一死塊北大鈞之所播激揚三鼓之
既餘雖萬里一空其羣彌有留良之嘆而四蛇各入其
宇豈無獨怨之求况君子樂得于英才繫大臣不忘于
微賤石田無用顧永無望歲之期焦穀可芽當大費噬
枯之力

上秦少保啟

張全真

頃羅憂患幾隔死生不自意全得以至此雖自念疾困
凶衰之迹未宜踵高明盛大之門仰託知憐敢忘冥昧
伏念往歲比試羣儒方今于經最高唯公奏策第一京
師尊貴材鮮可踰天下想聞人爭先睹而乃獨韜藏能
事謙禮諸生不間賤微悉敦契好而某也竊科甚下進
謁云初獨于衆人之間而以國士相遇傾意氣以相許
非流俗之敢期方幸從游更蒙鈞禮士固伸于知己誠
豈能忘生而得此于人盖實所寡每思磨厲用副推稱

夫何某殃罰及身喪志無日生理不治氣息僅存迺者
某官榮升諸公下澤四海願嘗有嚮者慕用之意而適
當在纍然憂服之中書疏不修禮文俱廢獨竊聽輿人
之頌而益欽長者之風未省餘年猶有見日恭惟某官
道德純懿學術通明既迪簡而在庭用承弼于厥辟正
直是好有勤勞王家之勲寬裕以容懷長育人材之意
顧如衰陋何所短長姑襲衣冠以持門戶固知夫時命
有所不敢以貧賤為羞然而踵父之業未能事生之道

或缺負米有志乞食何顏持是安歸非公無可惟大臣
務為國得士而君子樂以祿及親論其為士則或有可
慙至于養親則尤其所急于斯二者倘垂芘冒之仁則
有一馬願竭始終之報

上政府啟

趙承之

抱釁銜悲悼死亡之無日愒陰忼歲迫祥禪之既除分
甘溝壑之填敢有竿牘之獻仰膺照命復齒人倫勉自
強于面顏冀獲承于興寢候惟摯斂氣乃肅清恭惟某

官贊襄廟堂鎮撫華夏神明所助戢穀來綏某荼毒尚
新疲病如昔卧漳濱而太息阻造鴛行叫帝閭以嗚呼
冀充鷗腹幸大鈞之塊圯閔蟠木之輪困特加陶冶之
私俾伸蓬華之願雖江湖鳬雁無損益于平時而犬馬
蓋惟足彰明于厚德鄉風而問延頸以須歲將杪以向
寒時在陰而務耆願盛起居之適益遵調護之宜依歸
之深梗概于是

上從官啟

計敏夫

久去門闌係下風而仰止退依苦塊寄餘命以愒然迫
于禮制之除汙此朝綱之舊敢修問訊復冒覽觀惟秋
既探在氣已肅仰惟禁密之地休有吉祥之多某厲猶
董心跛僅能履尚嬰罪謫敢彈貢禹之冠雖欲馳驅實
曳伏波之足已抗章而自列祈置散以少安顧蒙篤愛
之私特許餘光之借候將改歲迹阻造門願遵調護之
宜無爽夙宵之衛其為懇至靡所喻言

五百家播芳大全文粹卷四十七

欽定四庫全書

集部

五百家播芳大全文粹卷四十六

詳校官編修臣謝振定

助教臣常循覆勘

總校官編修臣王燕緒

校對官中書臣李荃

膳錄監生臣莊大煜

欽定四庫全書

五百家播芳大全文粹卷四十八

宋 魏齊賢

葉 崇 同輯

回啟

轉廳為韓觀文啟

韓宗魏

祇奉明恩謬陞上轄雖剡章而引避終渥寵以難周自
顧缺然居常惕若伏念稟賦才非陋起迹羈孤幸蒙累

聖之誤知遂極一時之顯遇設簪筆以游禁闥秉籍以長
吏曹迨叅弼翼之聯何補朝廷之務不能則止徒懷知
耻之心無勞而遷數冒禁林之謗榮憂交萃啟處弗遑
此蓋伏遇某官推轂人才指南物論夙借言揚之賜致
茲眷任之殊其在感銘豈勝敷叙

轉廳回外任兩制啟

謬膺恩制進守省綱懇避弗遑兢憂深甚伏念某才非
適用仕遇逢辰荷累聖之誤知極一時之顯遇叅陪近

臣在苒周星迨聯承弼之司何補朝廷之事荐蒙渥寵
愈愧斐能茲蓋伏遇某官志在同寅愛行樂與風加推
引到此叨逾荷芳翰之見貽積感悚而良厚

回文太師辭免還洛啟

竊承懇避政幾願還里第士心惋愕睿意遲留囊奏弗
俞公車復上者六七詔書來下使人亟諭者再三况聞
徧勅于有司毋得亟通于所請重貽教翰尤切愧悚伏
以太師紀象雲臺銘功彞器朝相仁祖以躋嘉祐之太

平謀謨先朝克奉英皇之餘緒營武業于甘陵之下首
忠策于至和之間近起菟裘再隆師席矧惟二聖之謚
治方賴元臣之贊襄雖小爽于天倪況已臻于樂喜冀
體中宸之眷勉趨路寢之期其在勤倦固難敷悉

回韓丞相辭免啟

光奉制函顯陞宰席凡居陶冶靡不懽愉詢謀已出于
僉同抗疏尚聞于懇切伏惟某官養氣剛大抱才敏通
早逢同德之辰自奮有為之業忠能任重雖蹈險而不

移厚足鎮浮常處難而若易蒙知先帝久執天樞協翼
嗣皇親扶日御夙著著明之望宜登勸相之崇願屈固
辭俯從師錫

回韓丞相判北京辭免啟

誕布冊書寵升公衮顧在著明之重宜兼將相之崇
眷素隆師言久協尚深冲避固辭具瞻伏惟某官望冠
羣工道符熙運大忠至正誠為邁越于昔賢近弼遠臣
孰不儀刑于元老惟安危之注意屬文武之全能矧先

帝之眷知宜嗣皇之圖舊叅榮中鉉視秩泰階迺從西
洛之符再換北門之籥冀承溫詔仰副清衷某特沐謙
光何勝佩悚

回門下韓侍郎辭免啟

文穎叔

光奉宸恩進升省闈蓋徇僉同之志難從謙挹之私伏
惟某官直道在躬重名冠世愛民如子蕃宣皆豈弟之
誠許國在家獻替罄中嘉之論壯猶彌劬晚節弗渝久
席寵于禁嚴乃侍言于殿幄果躋柄用久協志心長孺知

經父子繼登于三事彥將稽古兄弟同貴于一門顧輿
頌之交歡雖露章而莫遂冀膺明命早副具瞻

回王左丞辭免啟

石懿文

廣寵制書冠榮省轄問望所屬懽抃攸同伏惟某官溫
厚以明惠和而敏以學術藻飾吏治騰躍士林以忠義
輔翼政幾被知宸扆果副搢紳之論蓋升丞弼之崇尚
執謙光未膺成命重蒙流誨曲示冲懷冀回懇避之誠
上副倚毘之意願言銘禱曷罄敷陳

回相使啟

伏以衰境倦游方丐辭于郡紱嚴宸過聽俾進讀于經
惟念叨冒之優隆方凌兢而遜避屢形奏牘尚期賜可
之音遽辱珍函益佩撝謙之美恭惟某官英姿絕俗厚
德鎮時洞韜畧之縱橫得詩書之醞藉擁貔貅而制勝
既分閫于將壇冠鴛鷺以通班復視儀于宰路動庸著
笑威望隱然邁文武之兼資係安危而注意抗茲強敵
久勤南仲之城方歸其侵疆允賴召公之闢國帝衷彌

簡公望並崇惟氣序之新涼宜福基之增固瞻承尚阻
徒遠遡于旌麾眷倚方隆願並調于茵鼎

回史督相啟

方秋崖

邊城分閫曾微赤羽之勞書殿通班忽峻紫宸之寵無
因至此何德以堪豈有方辭太常伯之除而迺驟躋真
學士之冠已控陳于免牘滋愧負于賀言伏念某本乏
修能誤膺重寄虜敢盜邊而凌中夏端由護塞之非人
幾不恤緯而憂宗周竊憤臨淮之多壘使當宸莫安于

丙枕趣兵符亟下于庚牌如有老熊當道之威安得佛
狸窺江之事興言及是厥咎安歸顧雖遄走于豺貅抑
亦大驚于鴻雁慨烟火萬里之氣象幾不聊生撫山河
兩戒之輿圖可為痛哭思欲自拘于司敗孰云荐被于
贊書躡登麟趾之華愈重孤冰之懼茲遇某官潤澤以
霖雨之手包涵于雲夢之胸以其介圭入覲于王自任
天下之重得諸傳岩爰立作相每嘆人材之難徵如腹
背之毛亦玷齒牙之論然端殿所以昭異數而大相所

以重中權顧惟何人敢當茲選某抗章之懇得請為期
人欲天必從之諒無勤于再命波及君之餘也覲乃贊
于一詞是謂玉成敢忘環報

回孫參政啟

李太尉

和門授鉞未奏戎功宸陛出綸旋叨郡寄自惟塵跡獲
邇台光蓋有夤緣尤深慶幸恭惟某官鎮時重器間世
真儒文章紱藻于王猷議論著龜于國政經綸事業贊
大化于黃扉巾履歲時適雅懷于綠野行膺丹詔佇復

青壇某樸樸無堪帡幪是賴誠未馳于尺牘貶先辱于
駢緘

回張太尉啟

李太尉

比膺中旨遠討羣凶幸三鼓而得成蔑一囚之漏網有
征無戰雖憑咫尺之天威適會成功亦賴輔車之隣助
自量繇力畧効微勞未釋介冑之塵埃允辱緘題之黼
藻其為愧感曷勝敷宣

回呂太博啟

張敬夫

茲蒙薰慈委貺賤翰不為華藻無非忠信之言歷舉大
猷脩著切磋之義詠味數過感藏至深伏惟某官世德
相傳天資甚茂立志靡追于時好行身立慕于昔賢暫
分典于泮宮益養成于遠器某相聞雖久既見未由永
惟事道之難莫若求人之要考麗澤之象正資講習之
功誦伐木之詩益見和平之助顧驅車之寢邇知傾蓋
之可期所期有過之必聞庶或臨民之寡悔

回張閣學啟

張全真

祇奉宸恩猥叨郡寄方密依于大莑側聞長者之風將
冒布于尺書已辱一介之使寵貽賤翰下逮鄙人竊窺
筆墨之光華仰服德意之謙厚內顧不敏罪焉所逃恭
惟某官材任大臣望隆法從文章爾雅蓋盡見于典刑
論議有餘宜與聞于政事尚淹在外未使居中方今神
明之不遺必圖柱幹之固守會聞詔下亟以公歸某自
分迂愚何心游宦顧甚矣衰殘之久聊復此來而嚮者
慕用之誠于今增劇敢意曲全于契好迺蒙備賜于拊

存匪惟小子之增榮益使孤蹤之有恃炎暑正爾燕處
裕如諒繁祉之方來相直道之所履願體眷意加輔寢
興瞻頌之深敷宣罔既

回劉閣學啟

出綸北闕賜履東川臣作股肱宜職五言之納王之喉
舌游勤四國之藩西顧既寬南圖益大恭惟某官清標
拔俗厚德鎮浮二十四郡之無人已見真卿之節一千
餘家之新火何勤長孺之行然使玉帳之輕孰借銅符

之重元戎小隊聊復班石谷之春方國紬書恐趨侍雲
臺之下某久燕居息復鳩僦功憑飛廉以寄聲若為厚
報望崦嵫而勿迫猶佇遄歸

回畢致政啟

李成季

謬膺煩使方愧于澄清夙仰高風雅懷于瞻覲遣牘未
遑于郵置貺音先辱于滕角伏惟某官藹著令名久躋
臚仕逡巡易退之節士夫共仰于懸車優游佚老之庸
談笑未承于揮塵即圖披晤深祝保綏感係之誠叙陳

奚既

回沈提刑啟

李太尉

比膺中旨遠討羣凶偶三鼓而得城無一囚之漏網退
惟僥倖寔藉威稜恭惟某官學有淵源器無塵滓謏論
太平之基本文章後進之規摹盛旦早逢亨衢濶步羽
儀仕路聲華居海內之先裨贊公家財賦幹城中之半
已深眷注行服寵光某素稟麋蹊幸依仁厚未拂塵埃
之介胄猶抱焦勞遽承珠玉之緘題過形撫問

回鎮江安撫啟

翟公巽

假守藩符獲依鄰境封疆密邇相聞鷄犬之音政化流行不待馬牛之及恭惟某官躬行豈弟體備中和久推重于縉紳固想聞于風采出臨藩屏糾合義師元帥搃戎首預幄中之畫敵人奔走獨專方面之勲乃眷殊方創為輔郡疇咨師帥允藉威名蒙福京師已賴洪河之潤倚强王室重增磐石之隆敢謂謙光首貽書誨徒佩芝蘭之臭未修桑梓之恭

回南京留守王侍制啟

試守東州初無善狀奉使西道信有誤恩被聖訓之丁寧奉明詔之寬大惟此八州之衆荐更連歲之凶視凋瘵以興嗟顧濶迂而無術莫寬憂顧徒積兢慙伏惟某官學以名家行為世法隱然天下之望蔚為君子之儒比事屬時名出漢庭之右愛民憂國政居良吏之前方此有行未遑政問不圖貶損遽屬褒嘉喜懼不勝筆舌難盡

代回王大卿啟

李漢老

入觀楓宸升卿棘寺民之攸暨久凝畫戟之清香王曰
遄歸復畀青瑣之舊物恭惟某官器質膚敏機量浚明
京兆有王之歌至今未泯江東無卿之嘆所去見思輟
自銀符入躋金掌敬爾攸獄監于祥刑民自以不寃行
課清明之效王言惟作命即登獻納之班某過沐幸臨
更勤委重菰寒冰玉覺執熱之頓清金錯瓊瑤愧報嘉
之不腆

代回成都吳制置啟

裁一箋而起敬未宣推謝之私累尺幅以鳴謙仍拜駢
章之寵施輕報重虛往寔來佩故舊之高情發衰遲之
深愧恭惟某官知推人傑學覺天民屹偉績以控荆蔚
奇勲以諭蜀凜然趙清獻之氣節行以張忠定之規模
撫五十四州之軍民瘡痍帖泰壯一百八盤之門戶氣
色晶明雪山之重旣多沙堤之築非遠某不堪視蔭復
此綴班無以公歸或一見而後去豈惟我賀亦衆目之

具瞻

代回李制師啟

疇庸帥閫升鎮制垣犀甲熊旂名在江淮之草木麟符
魚鑰光通河洛之圖書甚愜師言可謂國賀恭惟某官
材由世濟學與古稽自其不卑于小官人知將降之大
任故國非喬木之謂夙盤仙李之根今人莫常棣之如
皆近宮槐之影雅聞偉望尤抱長材洵分半虎之符妙
落全牛之必風寒數處人物渺然固封守以畫郊圻徒

得君重訖外庸而作丞輔無以公歸某濫守洪都密依
廣厦落霞秋水漸欲尋吳會之舟暮日春天安得對江
東之酒

代董侍郎回四川辛運使啟

帖荆報政沂峽觀風原隰之事孔殷正賴咨度疆場之
虞未靖尤藉轉輸賢者之來民所攸賴恭惟某官天資
凝遠風韵浚明巍峩千佛之姓名早宜臺閣屈折三神
之步武晚落江湖茲煩漢節之華來假夔藩之重跨灝

瀕之象不辭王事之艱難俯常山之蛇要識老臣之開
濟飛騰自此翹企俟之某別德恍然為僚幸甚尚憐往
日聽夜雨于巴山安能扁舟披朝雲于巫峽

回尤提舉啟

去國奉祠久抱伐檀之愧起家進職忽叨分竹之榮曾
巽謝之未遑何謙撝之甚寵恭惟某官見聞殫洽議論
崇懿尚書之履有聲典刑是似部使之斧直指風采凜
然皇華寧久于咨諏清切即觀于獻納某同為吳客獲

落楚鄉德必有隣倚輔車而增重服之無數藏簡牘以
為榮

回湖北曹提舉啟

短衣疋馬又塵紫橐之班長跪雙魚如見繡衣之面雖
無以報敢誦所聞恭惟某官學本遺經用周當世一種
陶潛之秫再依王儉之蓮杆黠敵于淮濱屹長城于漢
水慨然游及經宵縈之未嘗快哉此風搏扶搖而在下
屬重湖之瘡療煩一節之咨諏因而桃源之桃不妨假

館恐未熟橘洲之橘已見趨裝某久于離羣茲焉還綴
老夫耄矣更數旬金馬之門我公歸兮或一咲銅駝之
陌

回浙東孟提舉啟

肅將星駕分察日畿遠而光華況去天之尺五近在旦
夕佇擊水之三千曾旅進之末由何謙撝之先辱恭惟
某官器資凝重德宇浚明方公少年嘗栖棘于獨秀之
下維時老子偶泛蓮于鬱孤之旁屢獲過從不勝傾倒

淒其三紀存者幾人細思一夢之回何翅千帆之過天
子有詔選公卿于西漢之循太守謂誰疑姓名必東家
之故顧取斜飛之勢又為直指之行登蓬萊宮問百萬
蒼生之辛苦探會稽穴添一部史記之雄深舉頭即在
于長安濯足會登于雲漢某雞豚共社虎鼠同宮方欲
寫贊喜之懷乃先沐過情之謝承明之廬勞侍從之事
無以公歸邦家之光非閭里之榮豈惟我賀

回衢州王郎中啟

李太尉

和門仗鉞未奏成功宸陛出綸遽叨郡寄顧涼微以何
取寔獎提之有由恭惟某官學海龜龍詞林麟鳳荷橐
藹聲華之素崇郊同豈弟之多皂蓋雍容旌節暫頒于
屏翰青幢飛裊賜環倚俟于登庸某忝守郡符遠資河
潤往來靡履獲假道以無虞瞻望門墻再承顏之未卜

回柳嚴州啟

張敬夫

奉詔牧民方待臨州之次蒙恩易郡更叨桐水之除自
揆初心敢忘素守已上奉祠之請輒辭乘傳之行豈不

知在今此州寔拱行闕仰雲天之在望知日月之可依
地望既隆民俗且簡几席枕湖山之上簿書雜魚鳥之
間前瞻文正之風流尚想子陵之節槩叨逾過分夫復
何言然某方茲退伏于里閭且欲從于學問斯未能信
敢言輕試于治人道之難明祇合靜求于在已庶幾有
得不辱其先日冀大君之仁俯從小已之願豈謂山川
之阻忽勤魚素之致敢占蕪辭少叙鄙意恭惟知府朝
議以德履之甚茂全天才之有餘惟自處期忠厚之歸

故所至于牧養為事翱翔中外益著聲猷詠中秋之詩已
騰聲于近服陳治安之策即趨對于明庭某未諧先覩
之期徒負告新之意敢備偃藩之樂少留坐嘯之娛秋
律既深霜飈愈厲願體眷毳之厚益精調護之宜瞻頌
之深敷宣罔既

回方守啟

代

鄭敦夫

伏辱撫謙特貽諄誨獎提過分感畏交懷恭惟某官學
術淹該天資粹拔議論太平之根本規摹後進之先師

軒昂妙齡翱翔膺仕累分憂于茅竹暫均逸于枌榆琳
館優游素蘊經綸之成畫玉除簡注竚膺朝野之具瞻
某備乞下僚仰資餘範未遂登龍之便徒增希驥之勤

回覃靖州啟

蘇叔黨

狐狸未盡宜鵬鶚之橫飛騏驎先驅甘駑駘之在後顧
蹉跎而無用雖矍鑠以奚為過辱緘題重垂存籍仰君
子之有道識仁人之用心感極成悲驚定而愧恭惟某
官才推人傑名擅國珍相有擲筆之虎頭終封定遠忠

並伏波之馬革不畏蠻溪閭里觀楊樸之懷黃道路聳
賈臣之衣綉某忝茲別乘預切依仁方殘暑之秋風多
生寒之夜雨更期善攝以永壽祺

回李守侍郎啟

張正己

別德五年瞻風千里豈意專城之任獲依鄰境之光恭
以某官才過萬人身兼數器早仕清朝之計相蔚為當
世之吏師方屬邊鋒暫汙州綬與我共理豈惟求田里
之安入而為公將即脩廟堂之闕某曾未遑于問訊乃

先枉于誨存銘感至深敷陳曷既

回強守啟

孫仲益

憑熊軾而驅方切仰高之慕卧牛衣而泣莫申事大之
恭敢謂漂流契濶之餘尚勤撫奄矜存之意恭惟某官
七廟儒學一世吏師萬乘之器晚成千歲之姿難老奚
屬下車之始遽叨求舊之光著屐歡迎詎知折齒撫箠
嘆詠殆欲挽鬚高節邁倫哀病增氣諸儒談道所願陳
蓋公清淨之言小子學詩猶能賦王褒中和之頌其為

忻幸莫究名言

回鄰守啟

翟公弼

假守郡符獲依鄰境封疆密邇相聞鷄犬之音政化流行不待馬牛之及恭惟某官心存豈弟體被中和久推重于搢紳固想聞于風采某仰承德廕賴分燭之餘光矜式吏師知伐柯而取則不圖謙益先辱誨諭感佩之懷敷宣曷喻

回沈留守啟

李成季

瀝懇乞麾方自規于假守被恩易地猶外總于祥刑視
事云初賜魚先及伏以某官雅推令矩久著能名請留
鑰之臺綱暫資宿望披中宸之芝檢行踐華途覲德未
遑致郵不敏良有後時之愧益深內訟之私感忤既并
叙言罔既

回太守啟

比貢縉緘寺塵清覽禮無不答書匪盡言上君子之堂
未遑引袂拜使者之賜疊章置懷竊惟鎮撫之餘茂有

福祥之助恭惟某官聲猷華國器業在民早膺出使之
華尚屈偃藩之寄報政之速固無待于期年聞命而趨
將入陪于禁從佇聞瞻謁少罄叙陳

回太守啟

崔德符

比祇行役遠造巨藩獲仰覲于下風俾俯酬于素志過
蒙延勞脩極謙冲方結怨于旌麾已曲煩于臧感情文
具腆慙佩逾深伏惟某官渾厚而疏通高明而敬謹久
踐更于要地聊偃息于大邦聽中和之詩嘗窺窺于政

迹錫光大之寵行峻陟于禁途某整息驅馳方遙披覽
冀布宣之餘暇緩寢餽以惟和瞻頌逾深悃誠罔既

回太守啟

趙承之

班列追隨數瞻眉宇川塗隔阻屢易歲華缺焉竿牘之
修久矣飢渴之念亟聞開府切用鄉風伏以某官發揮
懿文揚歷膺仕眷素深于平日名猶盛于一時未容湖
海之淹聊付藩垣之寄北門清切吏豈識于嚴徐南畝
歡呼民但歌于召杜諒少須于報政行復慶于賜環某

智淺憂深才輕責重幸有光輝之託冀無罪戾之虞屬
未暇于占書已先蒙于賜教仰懷謙挹倍切感藏悃悞
之私梗槩于是

回安慶陳知府啟

望郎引外不孤銅虎之分倦客得遷只動蓴鱸之想未
遑修記遽辱鳴謙恭惟某官與學淵洄清標山峙氣沮
金石豈徒黃絹之好詞世掌絲綸宜得青壇之舊物亦
既累年于東觀非惟百日于南宮乃懷棠棣之碑徑賦

桐鄉之政朱光嘗為皖守非此地耶汲黯不薄淮揚今
名君矣某久荒三徑又長十連望吳會于雲間恨無飛
羽借潁川之河潤但切馳心

回金黃州啟

百舍思賢夢過黃泥之版一書委貺坐來赤壁之風讀
之洒然何以得此恭惟某官彩纓撫仕脫潁奇材屢風
月之平分蓋雲霄之獨步屬當寇至能與城存遂就畀
于麾符俾益堅于保障綸巾羽扇訪故壘于西邊畫戟

清香歌大江之東去何以累君子猶有十萬之羸進而
疆本朝行膺尺一之詔某既乘下澤又戀屬車邊秋一
雁聲漸起江湖之興人生五馬貴願精茵鼎之調

回姚開州啟

題慈恩之姓久遂託交傳盛山之詩始知出守遠勤委
翰更費屬辭恭惟某官續三世科為諸儒倡頡頏飛霞
之佩宜在漢庭簸弄明月之珠久留蜀道會膺表選亟
有裡除某洊守銅魚甚思尊鱸同年千里恍如琴上之

星何日一樽共聽簾間之雨

回福州蔡守啟

陵務觀

識面卜鄰固常懷于鄙志杜門埽軌殊未接于英游于此相逢慨然永嘆恭惟某官城南舊望江左名流高韵照人清言絕俗過眼不再真讀五車之書落筆可驚倒流三峡之水豈有如公之人物猶今隨牒于海邦政恐驛名之行弗容席暖之久某奔馳斗粟流落二年久親柱後之惠文高束床頭之周頌會須名理之語一洗簿

書之塵

回瞿通判啟

張敬夫

德門雅望聖世美才久更踐于民情益推高于吏治出
分屏軾尚淹半刺之權入佩荷囊行被九重之眷知有
斷金之義偶同退鷁之飛遠勤專介之臨重辱長牋之
貺褒揚過實展讀懷慙千里叙情愧非子雲之筆札一
時仰德未由披彥輔之雲天瞻頌之深敷宣罔既

回鄭通判啟

趙承之

紫極壯游嘗快謫仙之覩臨邛未宜敢迂貴客之過撫
歲月以若驚拜書言而甚寵情逾舊好喜倍新知恭惟
府判判院懿德渾成清芝絕出驗今于古有七相五公
之傳貫道以文必三代兩漢之作早屬休明之應運橫
翔英雋之蜚聲奏金石于蛙音和之蓋寡按鼓旗于小敵
就者其誰惟才大以未容亦器藏而有待粵從外屏荐
駕別車牛斗夜明方動德星之氣江山春麗信增筆墨
之光乃眷先猷宛存遺愛弔韋堤而繚若慨峴石之蒼

然周人之思召公尚勿殘其草木齊國之墓石相益以
勸于子孫第虞詔紫之新不待突黔之久某濫由早歲
嘗際後塵識張籍于衆人慙非輦行問車師于半面辱
記姓名茲妄意于親仁乃傳聞于便道逝虛久矣想聞
玉趾之音話舊歡然猶覲綈袍之賜

回洪通判啟

孫仲益

蓬萊方丈早窺雙壁之連雲夢南州又見一枝之秀顧
服膺之已久念修贄于無因恭惟某官文中兩科聲馳

九牧倚牛角而獨唱和者幾人跨鯨背以遠游超然萬里陳義振衰窮之惠占書移起廢之文末路增光衰顏動色誦佳句于百僚之上固已習于剽聞識小異于千人之中獨未先于快覩

回竹通判啟

張敬夫

義形辭色識辨安危惟險阻之備嘗宜功名之立致豈期歲月之久尚爾淹遲迺于州縣之間更煩闕決湏自吳門之別繼為南楚之歸寤寐雖勤書辭莫及知有斷

金之義偶同退鷁之飛茲承專介之臨首辱明緘之問
辭旨數暢展讀再三事理分明惟知感歎騏驥伏櫪無
忘驥首之時鵬鷃在天更看冲霄之翼

回鄧通判啟

熊叔雅

叨膺宸命濫竊使華顧庸妄以何堪寔吹噓之所自恭
惟某官行能超越學術深醇政所至于有聲才無施而
不可符分半虎諒猶鬱于遠猷及茂金牛顧未施于利
器佇登優最茂對異恩某方修問之未遑忽飛緘之先

及感愧交集數序奚殫

回韓通判啟

趙承之

過都問俗首欽通德之名慕義趨風方正治平之刺載
惟遇合寔慰羈窮恭惟某官世躡高華家傳儒業敏而
好古足以御令粲然有文因之飾吏事煩而才乃見用
小而聲自宏仲舉清明豈特豫州之望平原俊氣尚為
洛下之光佇觀驛召之嚴難遂里居之佚某拙無所試
困不知歸攘臂受薪自為得計抗容走俗何以見賢矧

聞同列之英更出華茵之近委書辭而過厚眷契義以
惟新並游冰玉之間自慙朽質修報瓊瑤之外徒激懦
衷

回胡參議啟

張敬夫

空冀北之野昔知人物之英佐湖南之軍今喜風猷之
近辱書先及佩意惟深伏惟某官以淳茂之資富通明
之學持心近厚蔚聞平謙之風正色不求雅有安恬之
樂惟瀟湘之都會控江漢之上流溪山阻深戶口繁夥

雖民安俗阜必資元帥之得人然川泳雲飛亦賴嘉賓
之贊畫是煩著德來慰輿情諒坐席之未溫即鋒車之
趣駕某自惟無補退切自修好語見貽知有斷金之義
從游在即更歌伐木之詩

回楊教授啟

鱣堂受業風教攸資鯉素輸誠謹光是感伏惟某官天
資醞藉學術淵源登桂籍以成名就芹宮而設教絳幃
奕奕姑發藥于羣書青瑣林林行並驅于衆彥某鉅輦

方釋俎豆是修有愧古人在泮而獻因馘尚期後日
執經而問春秋欣抃惟深敷宣罔既

回孫教授啟

張芸叟

伏承專使兼辱珍函陳義甚高多聞為富顧茲衰朽何
事雕鐫伏惟某官高藝懿文至誠尚志每念階庭之蘭
蕙忽收滄海之珠璣千里在駒一毛得鳳奏長楊之賦
代有其人求茂陵之書行看故老

回吳教授啟

戴谷老

疏榮芝檢典教芹宮學道愛人雖嘗佩聖門之教以經
飾吏今韋依師匠之模帝遣公來天為僕設恭惟某官
治聲第一經術少雙以心傳曾子之心所學得顏氏之
學題千佛經而蚤馳雋軌作三語掾而蔚有休稱方種
德以欽刑又助君而明教蓋張南浦之風猷如在而周
瀛溪之衣鉢尚存暫借文衡上續道脈小子皆有造樂
依鑑錘之功先生自此升大作棟梁之用不待煖席信
見予環某朴矣無庸冒焉學製從事俎豆而困于軍旅

勞心保障而加之繭絲嗟哉驢技之已窮韋甚鱣堂之
伊邇全資甄就庶獲璧全一卷之書必立師願安承教
十室之邑使為宰或可圖終頌詠之私編摩罔既

回徐司戶啟

周茂真

頃程多士獲窺黃絹之工今綴姻僚未覘紫芝之表懷
高山而仰止荷尺素以先之恭惟某官藝絕兼羣器韜
毘璞學能必至水萬折而東之問靡不知龜千年而一
聚早摘髭子上第將策足于要津某久矣嚮風幸茲託

契清潤相資于冰玉情辭益固于金蘭會面無從徒想
千人之異詔書甚寵莫將十部之賢

回蕭提空啟

張全真

鄉守謙勤驅後車而來過方欣晤語悵行李之言歸政
欲裁書少陳謝意遽貽翰墨具見情辭伏惟提空學士
師友淵源文章爾雅有聞于世偶時命之未遭以彼其
才尚陸沉而在下稽諸論者孰謂且然顧豈無人為言
于上會見詔書之來聘亟聞除目之新頒某僅接從容

又將垂隔重荷褒揚之過寔豈其愚陋之敢蒙既感德
以彌深唯向風而增遡

回胡糧料啟

孫仲益

三世青箱之學卓冠儒宗一時黃絹之詞具存家法函
書臨授跣履趨迎謬膺先進之從深切後生之畏恭惟
某官學窺聖域文拔國華重五十席于講肄之間奏三
千牘于公車之上貴名日起一坐盡傾俊辨風馳萬夫
皆廢家傳衣鉢固應在龍虎榜中世掌絲綸又將集鳳

凰池上猶勞謙于下問欲洪益于多聞聆妙寄于哀彈
雖粗識流水高山之意委殊珍于大貺終莫報明珠白
璧之投感頌之私占言難盡

回屬官啟

李太尉

和門仗鉞偶奏成功宸陛出綸復膺郡寄退惟謏陋全
自獎提伏惟某官濟世大猷過人器識早義冠于盛旦
爰潤步于亨衢姑試經綸暫作皇華之屬客行膺識擢
入陪青瑣之英游自顧萍蹤嘗瞻芝宇誠未馳于尺

讀貶先辱于駢緘感愧惟深敷陳罔既

回檢法啟

趙德莊

貴名赫奕久願列于下風羈宦浮游敢自期于方駕從
游有地慕用增懷恭惟某官體被中和才周果藝勤勞
州縣不邀當世之知練習憲章多傳通儒之議比簡平
反之望出陪直指之行紙上深文快婦煩苛之弊毫端
陰德自為富貴之符某猥以窮途將承餘映倦游半世方
嗟舊事之空妙札五雲竊喜新知之厚永言感抃曷罄

數陳

回司理賀月旦啟

張雲翼

文場薦鶚夙欽科甲之榮縣棘棲鸞暫屈雲霄之望方
用經術而飾吏且執古道以御今果推不疑之平寃共
識仲由之折獄恭惟某官才周世務智達人情義不辭
難事奚擇地遂有祥明之選深期審克之精民為不寃
豈積高門之慶雀寧無角宜歌行露之詩屬茲吉月之初
先辱謙辭之及永言欣佩莫罄敷宣

回余節推啟

趙承之

江城投分嘗陪觴豆之歡海國倦游猥託茵馮之契載
循菲質敢懸英流恭惟某官天與長才日新懿德本本
北方之學嗣乃家傳循循西漢之風發為官政蚤踐登
于要路晚猶客于諸侯崔李所崇主人可知其德范岑
是與太守不有其功方交薦于公車佇入趨于魏闕某
粵從雨別坐想風期顧弛擔之未能辱占辭之遽及簡
書自縛徒興棠棣之思懷袖生光殊愧木瓜之報

回州縣官啟

張敬夫

南為祝融客方自屏于江湖郡枕子陵溪忽豈分子符
竹雖公朝之不棄在私義之未遑蓋退而治已尚多缺
然則出而臨民其敢率爾輒上祠宮之請自維編簡之
求豈期薰慈遠貽慶問三復辭情之美益增顏面之慙
恭惟某官論議該深見聞卓異素所蓄積蔚為瑚璉之
珍暫爾淹遲莫該牛斗之氣未遂同僚之幸徒勤仰德
之懷愧感之深數宣罔既

回新應靈趙知縣啟

一門父子謂皆分唐室之珪五色神仙顧少屈趙家之
玉有來委翰知可得朋恭惟某官千里名駒九苞威鳳
宗室隨二千石飽聞議論之高文章長萬丈光坐想垠
崖之豁况已摩空而奏賦不難趾美以決科何為渭北
清新之材乃屈河西淒涼之職吟竹弓之射姑唱東野
之詩登文石之途即上南昌之疏某舊交中壘今見休
侯正望弓刀帖鼠竊狗偷之警却從筆硯窺蛇神牛鬼

之奇

回趙主簿啟

方巨山

麟鬣分夜雪之燈未寒章夢魚素遞春風之訊適近枳
棲跂重論疇昔之心喜不隔同年之面恭惟某官聲光
如斗氣韻欲仙小奚佩古錦囊吟盡風檣之騷句太乙
然青藜杖讀殘寶苑之秘書久已騰淡墨之輝何至賜
勾朱之昂雲深曉殿盍隨鴈鷺之行花動春城式快鸞
鳳之翥竚頌瑤札儀我銀潢某拙則未除資亦不改弓

韜一尉樗櫟之才何堪硯老半生齏鹽之味故在抵掌
豈甘于俗吏折腰猶近于世情羣然虎吠之中以螫蜂
蠆之毒官事未易了也無已太癡吾道其果非耶奚為
敢愠延覲金蘭之好惠垂玉璫之規野梅吹江路之香
尚須佳晤山雨語廬高之舊重挹清芬

回張縣尉啟

李漢老

瞻海上之槎恨差池于八月取圯下之履望傳授之一
編袖賤臨之展卷愧甚恭惟某官負材孔碩蓄學不貲

英英修月之文飄飄凌雲之賦朝華本高于夕秀夙知
乃墜于暮成入對大庭良負誦書之三篋出次遠關尚
賢不調之十年况長江素委之詩人豈市門可遠于仙
吏暫返輕舟于吳會即歸大老于周家某甫欲款門先
蒙命駕以霸陵李將軍之老倘不見呵則天上張公子
之賢敢忘加敬

回王僊尉啟

方巨山

飄飄仙吏寧窮隱山冉冉老農有來妙墨彼美瓊溪之

秀可忘三徑之荒恭惟某官詩書典型家世文獻問訊
淳熙之相印歲月幾何起分寶婺之天章江山故在何
意解牛之办小迂射鴨之弓蓋鯤鵬九萬之程始從足
下想瀟瀟一毫之瑞已在目中某冒然得州決矣學圃
爾杞爾菊維今無吠月之驚某水某丘誰與共耕雲之
樂尚驅犇犍快覩匿犀

回陳簽判啟

高子美

老得下州慰意豈闕于朱紱賢推上佐傾心正屬于緹

油慶交印之云初省馳緘之不早詞華下逮悚汗愈增
恭惟某官地望峻高天材英特談笑剪綠林之盜雍容
綰花縣之章茂著顯庸亟遷華要暫贊烹鮮之治聊觀
展驥之長惟是老成宜膺重寄拭目鼎來于驛召奮身
優膺于時頌某共理無堪同僚有賴知克希于嘉會蓋
獲任于長材跂詠雖勤顧乏佩刀之贈追從非晚徒伸
別榻之恭

回鄭宰啟

鄭敦夫

承宣雷地豈第攸聞披覩雲天翹跂以望未遑尺牘先
辱駢緘雖然以道為懷寧不于心有愧恭惟某官風猷
卓絕器局宏深以從容適時之才而周旋當世之務學
優而仕剴然漫試于牛刀課最以聞識擢行膺于鳳詔
某自惟塵跡素仰英標愧茲蓮幕之冗僚窮途何取賴
有花城之賢士餘潤是圖

回王都監啟

趙德莊

聞風嚮往久馳胡粵之心為米竭來乃近芝蘭之臭事

雖邂逅榮過平生伏惟某官智畧通明才猷敏劬策勲
書劍不孤烈士之壯心游意壺歌未覺將軍之好武久
鬱中權之選猶分外府之師羅節制于萬營雖借爪牙
之衛注安危于三柄佇聞輦鼓之思某猥以妄庸獲依
光潤顧心言之未抒辱口占之已先不善操刀將發旁
觀之笑相逢傾蓋尚期忠告之私

回李監稅啟

趙德莊

迺者辱枉華軒况臨敝邑謙謙君子之德先以書辭戀

戀故人之情溢于眉宇佩金蘭之罔替愧藥餌之莫陳
別去向新瞻依如昨伏惟某官學深奧閭行踵前修蕭
育才能寔傳名世之緒王忱雋望雅有外家之風久專
翰墨之場小試舟車之筭致層臺于覆簣發游必于新
硯好賢若緇衣方仰清門之盛舉士于筦庫矧當公道
之行某託契自先聞風甚美常恨登門之晚豈期游宦
之同綵衣袞然尚想德星之聚練冠沲若何勝風樹之
悲庶相與以盡心用無忘于永好

回監稅啟

趙德莊

倦游書劍飽聞奇士之風漫仕江湖適奉末塗之契幸
非自意喜至忘言伏惟某官冒出故家學該益友浮湛
世俗不卑筦庫之勞跌宕功名竊笑儒冠之誤方弛張
之並用雖隱側以無遺有如從者之淹寔鬱輿人之誦
佇期類舉往取壯圖某猥以妄庸將承光潤顧心言之
未抒辱口占之已先多病早衰永嘆兼葭之倚平生久
要庶幾草木之同

回邶縣侯監稅啟

李漢老

無隴西李博之材濫茲巢幕有夷門侯嬴之智亦爾抱
關委贄相先報章敢後恭惟某官學卑衆楚家近三蘇
衫曳枯荷難畏崔嵬之氣手摘玄草漫為拓落之官暫
屈關譏聊從吏隱佇漢庭之用老從吳市以登仙某未
洗袴袍辱迂車轍載披郇翰有言何至于失人倘憶邶
筒無酒或容于酤我

回周監酒啟

李漢老

叨恩試郡正懼曠職聊事同僚幸逢名勝愧陳箋之不
敏辱垂問之相先伏惟某官抱負恢宏典刑膚碩暫屈
糟丘之隱小試清醇諒知酒誥之篇益加醲郁佇階騰
踏即踐高華某老矣倦游冒焉遠戍對北海而捉私釀
免俗未能交公瑾如飲醇醪同寅是望其為傾僕罔既
敷陳

回李監酒啟

李漢老

元辛之號重光天回西顧剛卯之稱單閼日麗東迎亨

在泰通祥因履考恭惟某官清才曠達懿識規圓蒼壁
絕瑕彌聳旦評之望青旗簇仗行登元會之班諒封於
菟之交益介踞龜之壽某尚稽賀牘過辱頌言尚可歸
田正有望土牛之送不堪立伏詎肯希櫪馬之喧

回張茶馬啟

方巨山

奏最蕃宣易司權牧臥雲而逼象緯榮分東壁之光摘
山而市駿蹄益固西秦之圍恭惟某官味甘若水心秉
塞淵出乘兩掖之清風已親法駕勒回中道之奔電歸

捍氏羌茲揚春山之旗久擁東方之騎非環非玦上有
雙鸞載馳載驅駕彼四牡取月團三百片之美包以綢
奩供天子十二閑之須爛如雲錦佇頌鳳詔趣扈龍旂
某有味溪茅無心天駟烹玉澆過秦之論徒抱渴塵蘭
雲作徠僊之歌更觀逸足

回聶提舶啟

肅駕星輶總司海舶舳舻千里有無得以懋遷胡越一
家內外服其平準是為膚使允屬通材恭惟某官世濟

象賢早騰燕譽青氈舊物曾旋北斗之樞畫戟凝香晚
試南交之宅不嚴而化所去見思惟是嶺陬久資錠稅
扶胥黃木習廉介之具浮銀甕白環紛貢珍之並入貪
泉酌水已知吳隱之心祥飈送飄佇膺孔戣之名某卜
鄰有幸賀厦已稽六柜五羊難續仙游之夢尺書雙鯉
空慙寄驛之情

回王先輩謝及第啟

伏承擢秀儒林策名仕版素缺雅問倍極驩悰惟是穆

清之臣尤高廉茂之選人侵文治術陶聖真闢衢途以待奔逸之才畧華藻而收根本之學與以奧問巨目評以宗工碩生充賦者數雖三千中等者纔堪二三預於此者不其榮哉而况奮飛接羽於鵠原煒煜睥芳於棣萼固為朝野之異觀坐挹淮湖之駿聲仍沐冲懷遠貽長續其於景佩曷既喻言

回士人謝解啟

嚮公臺檄往攝文評幸獲時髦以安鄉諭竊以近之取

士其實不自有司蓋辭之精粗有明形而理之通塞有公議如射之中也否也非我力之可以為如繪之是耶非耶亦衆目之不能掩况榮辱皆係於此豈好惡敢私其間顧惟澍俗之尚儒尤謂毘陵之多士碩師賢守之所倡竒童茂學之所趨褒衣危冠者郵希軻雄搦毫伸紙者皆小莊老且所取者十二數而來賦者逾二百名苟或得之可為難矣恭惟先輩足下才傾庠序氣秀湖山素亦貫穿於本原不獨玲瓏於黼藻方慶漸鴻之舉

亟行汗竹之儀其在感藏曷勝悃悞

回士人謝解啟

校藝棘園標名楮榜遍里閭而交慶偕縣邑以增輝伏
惟解元錦繡肺肝珠璣啖唾起文章之光焰得師友之
淵源素馳譽於鄉閭果登書於天府未遑短啟先辱長
牋永為篋笥之藏深乏瓊瑤之報欣成八月已穩泛於
靈槎喜俟三春更高攀於仙桂

回陳將仕啟

林清甫

彭澤清行聊適弦歌之嘆單父方至何來冠蓋之迎猥辱長牋益欽雅意况久聞鄉曲之譽實素推人物之評召見高年當先問益昌之政苟有貴客可同為臨印之恭

回宋掌儀啟

都騎而有貴客未為臨印之恭隻鯉而遣長鬚已識玉川之意何十幅八行之駢儷無一文半字之類瑕慰籍甚勤周稱太過為令尹而無喜色蓋非所能見君子則

降我心猶恨其晚

回縣學職事啟

林豈塵

武城而有戲言安得弦歌之笑單父而聞鈞道何煩軒
蓋之迎方為新樂之知猥辱華牋之貺深虞過譽亦見
高懷傾精學校之勤行為場屋之用冉求使之宰我慙
居弟子之先趙德可以師君無愧衙推之請

回鄭秘校啟

自遠方來始合有朋之趣見鄉人喜少寬去國之思况

我輩罕有相投若吾子不可多得識之已恨其晚欣然
欲與之游觀其養氣則平生之耿耿常存至於論交則
輕薄之紛紛何數豈一文半字之或吝以兩紙八行之
見遺明珠雖為暗投美玉自有定價青眼以待佳士雅
在夫一日之間白首而逢壯夫情將見於十載之後

回鄭解元啟

弦歌聊試初為彭澤之行車騎甚多未展臨卽之敬辱
君之好惠我以文想其胸襟藏鄴侯三萬軸之書能以

汗墨得樊南四六集之體載眈方味益見高情苟以為
賀又何足云至於稱譽太過十室之邑可使宰此未免
士大夫之譏一卷之書必立師頌曲從群弟子之請

回畢安撫正啟

天運璇璣又屆履端之始春生玉帳載迎善政之祥恭
惟某官豹略沉深虎符靜謐麥苗綠漲挽回幾千萬戶之
和柳葉青歸喚起二十四橋之夢三陽為泰百祿交升
某方欲具箋猥勤委翰椒盤啟節莫殫頌禱之私玉燭

朝天願保功名之重

回周馬帥正啟

正月始和光輔崇蘭之畹元戎小隊暖生細柳之營恭
惟某官克壯其猷共武之服東風解凍知挾纁於雲屯
北升回轡即出綸於天陛某濫持荷橐莫捧椒觴玉漏
聲長行或睽於朝著金印斗大願益懋於勲名

五百家播芳大全文粹卷四十八